

Unga siunnersuutip siullermeerneqarnissaanut akissuteqaat: Nunatsinni nerisassiarineqartut pisiniarfinni akiinut suut tunngaviusarnerat pillugu Naalakkersuisut nassuiaasiornissamik peqquneqarnissaannik Inatsisartut aalajangiiffissaattut siunnersuut. Nioqqutissat akitigut pisisartunut pilerinarnerulersinniarlugit qanoq iliortoqarsinnaanera nassuiaammi ilanngullugu tikkuarneqassaaq. Nassuiaat kingusinnerpaamik UKA2024-mi saqqummiunneqarsimassaaq.
(Inatsisartunut ilaasorta, Mariane Paviasen, Inuit Ataqatigiit)

Akissuteqaat

(Nunalerinnermut, Imminut Pilersornermut, Nukissiutitut Avatangiisinullu Naalakkersuisoq)

Siullermeenera

Naalakkersuisut sinnerlugit Inatsisartunut ilaasorta Mariane Paviasen, Inuit Ataqatigiit, siunnersuummik saqqummiussaqaqnerani qutsavigaara.

Siunnersuut Naalakkersuisut imminut pilersornermut isumaannut naapertuulluinnarpoq. Siunnersuut pingaaruteqarpoq, aammalu nuannaarutigalugu oqaluttuarisinnaavara, imminut pilersornerunissap anguniarneqarnerani akimmisaarfinnik qulaajaaneq imminut pilersornermut periusissiamik suliaqarnitsinni ilanngullugu eqqarsaatigineqareemat. Nunatsinni imminut pilersornerup annertusineqarnissaa naalakkersuinikkut salliutinneqarpoq. Kalaallit Nunaat imminut pilersornerusoq pilersissavarput. Kalaallit Nunaanni innuttaasut tamarmik najukkaminniit nerisassanik pissarsisinnaassapput, aammalu inuussutissanik pilersuinermi isumannaassuseq pitsaanerulissaaq. Nerisaqarnikkut kulturerput piginnassavarput illersussallugulu, aammalu tulluusimaarutigalugu kinguaariinniit tullernut ingerlateqqittassavarput.

Naalakkersuisuniit Kalaallit Nunaanni imminut pilersornermut periusissiaq siulleq suliaralugu aallartippapput, taassumalu 2024-p naannginnerani naammassineqarnissaa naatsorsuutigineqarpoq. Takorluugaq aqutsisuususaq tassaassaaq *”innuttaasut tamarmik najukkaminniit nerisassanik pitsaasunik peqqinnartunillu pissarsisinnaapput, aammalu kalaallit tunisassiaat aqutitigalugit inuussutissanik pilersorneqarnermi isumannaassutsip pitsaanerulernera misigisarpaat”*.

Periusissiamik suliaqarnerup ingerlaqqinnerani najukkani nioqqutissiat siaruarterneqarnissaannut akimmisaarfiit *tamaasa* misissoqqissaassavagut, taakkunungalu akit katitigaaneri ilaassapput. Nunatsinni imminut pilersornerup annertusinnissaa iluatsissappat, tunngavissat nunatsinni niuernermit unammillertitsisut, aammalu tunngavissat nunatsinni niuernermit ingerlatsisuusut paasinissat pisariaqarpoq. Tamanna pequtitigalugu unammilligassat, periarfissat akimmisaarfissallu tamaasa nalunaarsornissaat suliaassani qitiusutut inissisimapput.

Nioqqutissanik najukkaneersunik, unammillersinnaasunik akilinnik, ersarinnerusunik qaffasissunillu pitsaassulinnik niuerfimmik nukittuumik qulakkeeriniarluta sulissaagut. Tamanna anguniarlugu immikkoortut tamaasa aqqiissutissanut ilaattissavagut. Tunisassiortut, niuertut niuertarfiillu ataatsimut aqqiissutissanik ataatsimoortunik, atuisunut iluaqutaasunik pilersitsiniarnermi suleqataassapput. Nunatta imminut pilersornerata annertusinnissaa tamatta ataatsimut soqutigisaraarput, aammalu kinaluunniit kisimiilluni angusaqarsinnaanngilaq.

2030 sioqqullugu nunatsinni imminut pilersorsinnaanerup annertusitineqarnissaa anguniarlugu, periusissiaq anguniakkanik immikkoortuinik suliniutissanillu aalajangersimasunik imaqassaaq. Periusissiaq najukkani inuussutissanik pilersuinerup innuttaasunut aningaasartuutikinneruffiulernissaanut sinaakkusersuinermi iluaqutigineqassaaq. Taamaalilluta nammineerluta isumalluutitsinnik atuinerput annertusassavarput, nunarsuarmik avatangiisitsinnik pinngitsuuisinnaannginnerput annikillisissavarput, inuussutissarsiutigut siuarsassavagut, nerisassanik eqqaasarnaq annikillisissavarput, aammalu kulturerput tulluusimaarutigullu nukittorsassavagut.

Tamanna tunngavigalugu Naalakkersuisut allannguutissatut siunnersuut manna saqqummiuppaat:

”Nunatsinni nerisassiarineqartut pisiniarfinni akiinut suut tunngaviusarnerat pillugu nassuiaatip Kalaallit Nunaanni imminut pilersornermut periusissiap siulliup suliarineqarnerani ingerlasumi misissueqqissaarnermut ilaatinneqarnissaanut, kiisalu Imminut pilersornermut periusissiap 2024-p naanerani agguanneqarnissaanut Inatsisartut aalajangiiffigisassaattut siunnersuut.”

Naalakkersuisuniit taamatut oqaaseqarluta nuannersumik pilersitsiviusumillu oqalittoqarnissaanut qilanaarpugut.